

15 APR 2001

PERDANA MENTERI SAMPAIKAN PIALA PERDANA 2001

KUALA LUMPUR, 15 April (Bernama) -- Perdana Menteri Datuk Seri Dr Mahathir Mohamad hari ini menyampaikan hadiah kepada para pemenang acara "showjumping" pada pertandingan Equestrian Piala Perdana 2001 di sini.

Quzier Ambak yang menunggang kuda Domingo memenangi tempat pertama diikuti Peter Abisheganaden dengan kudanya Chakwal dan ketiga Qabil Ambak dengan kuda beliau Red Cloud.

Sementara itu, dalam buku cenderamata sempena pertandingan tersebut, Perdana Menteri berkata Malaysia mesti berusaha untuk memasukkan sukan equestrian dalam peta equestrian dunia.

"Kita mempunyai peluang untuk mengambil kesempatan daripada Siri Piala Perdana ini untuk menjadikannya pertandingan yang hebat serta menjadikan Malaysia sebagai pusat Sukan Equestrian di Asia Tenggara, malah di Asia," katanya.

Siri Piala Perdana yang pertama kali diadakan pada 1991 yang ketika itu dikenali sebagai Kejohanan Antarabangsa Asia Tenggara, dianjurkan sebagai penghormatan kepada Dr Mahathir yang sememangnya suka menunggang kuda.

Pertandingan itu yang bermula Khamis lepas di Bukit Kiara Equestrian and Country Resort, berakhir hari ini.

-- BERNAMA

MHI ES LAT